

Parlimen: 500,000 Permohonan Untuk Rumah PR1MA Diterima Setakat Ini
Bernama
27 Mac, 2014

KUALA LUMPUR, 27 Mac (Bernama) -- Persidangan Dewan Rakyat hari ini diberitahu sebanyak 500,000 permohonan untuk memiliki rumah di bawah projek Perumahan Rakyat 1Malaysia (PR1MA) diterima sejak pendaftaran dibuka tahun lalu.

Menteri di Jabatan Perdana Menteri Datuk Seri Shahidan Kassim berkata kesemua permohonan berkenaan diterima secara dalam talian membabitkan 80,000 unit rumah PR1MA.

"Sebanyak 80,000 unit yang diluluskan peringkat awal kini berada pada pelbagai peringkat termasuk analisa dan perancangan untuk tujuan pembinaan.

"Sekarang ini kita teruskan pelaksanaannya dan masih membuka permohonan secara 'online'. Apabila siap, kita akan menyerahkannya mengikut ketetapan," katanya menjawab soalan Datuk Wee Jeck Seng (BN-Tanjong Piai) di sini.

Shahidan berkata kerajaan juga akan mengadakan mesyuarat bersama Perbadanan PR1MA Malaysia bagi membincangkan projek fasa kedua yang membabitkan 80,000 unit rumah lagi tahun ini.

"PR1MA bukan sahaja sebagai pelaksana tetapi juga menguruskan permohonan rumah PR1MA. Sekiranya mereka yang layak membeli rumah itu tetapi melanggar peraturan, rundingan semula akan diadakan," katanya.

Kediaman PR1MA ditawarkan kepada rakyat Malaysia dengan pendapatan bulanan isi rumah antara RM2,500 dan RM7,500.

-- BERNAMA

Copyright © 2014 BERNAMA

Source: <http://www.bernama.com/bernama/v7/bm/newsindex.php?id=1025341>